

左恪靖侯奏稿續編

恪靖奏稿續編卷七十四目錄

布魯特安樂延合謀入寇進剿大捷摺

已故軍務人員志節可傳請 宣付史館摺

遵 旨開單報銷摺

疊奉 恩旨出示曉諭摺

布魯特安集延合謀入寇進剿大捷摺

奏爲布魯特安集延兩部合謀入寇官軍進剿大獲全捷恭摺馳陳仰祈

聖鑒事竊上年安集延賊首阿里達什勾通布魯特逆回阿布都勒哈瑪及其子買賣提斯拉木竄擾邊境經官軍擊敗阿里達什伏誅阿布都勒哈瑪父子翻山竄逸各情形經臣於上年十二月二十一日馳報嗣准通政使司通政使二等男臣劉錦棠緘牘並稱阿布都勒哈瑪父子敗竄俄屬阿來地方議投俄羅斯俄官令其

暫居邊境阿布都勒哈瑪遂勾結寄居俄境之安集延
酋愛克木汗條勒阿希木汗條勒咬買提和卓再爲內
犯之計條勒和卓者回部尊其教祖後裔之稱如中國
之稱聖裔也愛克木汗阿希木汗二人本同胞兄弟卽
從前首逆張格爾胞弟玉素普之孫阿布都勒哈瑪之
勾結愛克木汗者以其爲安集延酋長應與阿古柏報
復爲詞其勾結阿希木汗咬買提者以其爲條勒和卓
足令布魯特各部歸心也向三逆誑稱南路沿邊一帶
有眾數萬許爲之助待汗與和卓到卽起事奪回各城

愛克木汗等信之率其屬胖色提二十餘人玉孜巴什
百餘人所部安集延回眾八百有奇於上年十二月十
三日徑抵烏魯克哈提地方我守外卡纏回頭人布魯
特頭人及回兵共二十八名被其擄去又脅誘正西西
南一帶布魯特各部其不從者殺之至臘底聚眾已一
千七八百人由烏魯克哈提而東三百四十里爲卡浪
圭內卡再東六十里曰明約洛卽明要路距喀什噶爾
城百里劉錦棠連接邊報賊氛漸近矣明約洛本喀什
噶爾要隘劉錦棠原派總兵田九福步隊一營扼守賊

不得過上臘二十八日遂繞向東南竄至畢勒套格依
地方又以水草不足本年正月初一日復折而南趨至
博斯塘特勒克地方卽希布察克布魯特比所居也其
左大山綿亘其右山巒起伏中爲廣谷水草甚便出谷
口東南行六十里爲烏魯阿提外卡有路可通色勒庫
爾一帶再東二百里爲塔什密里克之伊勒庫楚內卡
山谷口正東行百六十里爲烏帕爾之烏帕拉特內卡
稍南爲烏帕爾之玉都巴什內卡地皆戈壁賊出畢勒
套格依北來皆必經戈壁惟博斯塘特勒克後面開原

錯雜草木叢茂由此西北行二百里爲阿依阿提外卡
再西二百里爲卡拉阿爾提又一百八十里爲黑子里
拉提達板逾此卽入俄屬阿來地界賊之踞博斯塘特
勒克者以其爲布魯特比駐紮之處意在盡蠶希布察
克各野回部眾以厚其勢而協以謀我也劉錦棠詳考
地圖稽諏各布魯特部眾而得其詳意以官軍前去必
度戈壁戈壁平衍一望無涯賊得覘我虛實動靜預爲
準備似此示形以致寇非計之得也須伏兵山谷待賊
來擊之遂定四面圍剿之策五年正月初三日派提督

方友升率所部二百騎進烏帕爾提督譚慎典率所部
二百騎進玉都巴什駐營兩營相距三十里飭令分段
偵明賊蹤隨時飛報又陰縱卡內布魯特人投入賊中
佯言官軍無多誘其深入初七日方友升報賊眾大至
約二千三四百人游騎已擾至烏帕拉特近邊劉錦堂
遂留知府袁堯齡督同總兵侯名貴率礮隊一旗親兵
一哨守漢城總兵杜錫斌率步隊一營守回城先派提
督張俊督同提督胡登花石蘊玉率步隊千名由英吉
沙爾取道圖木舒克以向塔什密里克限初六日午正

到烏魯阿提防賊旁竄文派提督董福祥督同總兵雷九福率步隊千名提督張宗本總兵夏辛酉率三百騎由喀什噶爾回城取道卡浪圭拔至無胡素魯克該處西距烏魯克恰提百二十里東南距畢勒套格依二百里以圖截賊來路並飭官軍到時或賊尙未折轉則急進畢勒套格依駐營扼賊回竄皆令捲旗息鼓以行劉錦棠自率道員羅長祐營勇並喀什城防勇步隊一千五百名親兵步隊一百六十六名馬隊二百騎於初九日黎明由喀什噶爾漢城啟行是夜接方友升馳報本日有

騎賊三十餘直薄烏帕拉特卡當經擊退賊向博斯塘
特勒克竄走並訊據纏回擒獲探賊供稱賊中傳令是
夜由博斯塘特勒克來烏帕爾擒官軍營盤劉錦棠以
賊由南路來地勢平坦一經官軍剿敗退竄歸巢地散
路平官軍雖躡賊窮追未能多殺不如先取其巢待賊
返擊之遂留參將劉必勝提督段柏溪張復良李雲照
已革外委何俊率步隊七百五十名紮烏帕爾莊外助
同堵剿派羅長柏率提督譚慎典方友升楊金龍馬隊
五百騎小馬隊四十騎及提督張春發湯彥和張仕林

彭明達曾楚南總兵彭禮堂把總張鴻疇步隊七百五十名是夜由北面小路銜枚疾走向博斯塘特勒克邁進約次日天明取齊逕擣其巢部署定羅長祐卽率隊前進黎明行近博斯塘特勒克谷口守巢之賊方散布谷中熟睡未醒其驚覺者倉猝間覓軍械不及我軍馬步馳至鎗礮之後繼以刀矛斃賊五百餘名訊據擒賊供稱大股賊已於初更向烏帕爾去矣羅長祐令馬步各隊暫憩谷內飲馬作炊一面派騎四出偵探午間遙見戈壁東面塵土大起偵者回報賊由烏帕爾折回羅

長祐令各隊偃旗臥鼓以待方賊之由博斯塘特勒克
進襲烏帕爾官營也行至烏帕爾西南十里地方天尙
未明其地在戈壁內久爲山水衝刷遂成平沙可容多
騎賊停隊於此天明賊先率百餘騎逕撲烏帕爾官營
劉錦棠聞報卽令劉必勝何俊率隊先往擊之自率段
柏溪步隊及馬隊繼進爲其策應又令張復良李雲照
各率隊伍多張旗幟作爲兩路一由烏帕爾迤左樹林
抄出一由烏帕爾迤右山溝抄出均約於大股屯集處
會隊劉必勝何俊之隊首與賊遇分左右進擊之賊騎

百餘敗走劉必勝何俊方躡蹤追剿忽西南溝內大股騎賊紛紛結團衝出劉必勝何俊勒馬整隊以待騎賊分圍更番來撲屹不爲動賊改用圓陣四面環攻洋礮又鎗子如雨注劉必勝何俊督劈山礮抬鎗洋鎗各隊層疊施放鏖戰正急何俊被子傷腦適策應各營齊至號鼓齊鳴聲震山谷小馬隊回馬隊先進段柏溪步隊繼之張復良步隊已由右面抄至李雲照步隊亦由左面抄至賊覩官軍馬步相依聲勢聯絡且層見側出不知多少未敢戀戰劉錦棠揮隊壓追三十餘里擒斬悍

賊百數十名見賊仍向博斯塘特勒克返竄知其已墮計中從容收隊還至蘇巴什就水草紮營遣騎馳偵前途戰狀敗賊回竄博斯塘特勒克初十日午初即近谷口羅長祐令譚慎典方友升楊金龍等列馬隊於谷外令湯彥和張春發等率步隊仍伏谷中自登左面山坡相機調度賊瞥見官軍阻其前亦整隊拚死繼進每團約四五十騎前後兩股共約四十餘團作連珠勢與官軍接鎗礮對施半時之久互有傷亡勝負未決羅長祐令各馬隊以長矛衝陣譚慎典率數十騎怒馬挺矛直

入賊陣遇賊卽刺斬賊首買賣提斯拉木於陣前賊陣
大亂楊金龍率隊由右路進方友升率隊由左路進各
弁勇無不以一當十殺賊以三百計賊既不復成陣分
爲左右兩支右股多約千騎急圖奔歸巢穴徑向谷右
衝入不料谷中又已設伏也湯彥和張春發等布隊見
賊至突起鎗矛並進斬馘遂多逸賊棄馬翻山羅長祐
麾各營馬步緊追霎時擒斬淨盡斬賊首買賣提和卓
阿希木汗條勒於陣其左一支約五百騎敗後繞由谷
外傍嶺脚西竄圖出阿依阿提外卡譚慎典方友升楊

金龍等率馬隊躡追賊且戰且走譚慎典以一夜之力馳二百里直追至阿依阿提外卡沿途殺騎賊三百餘并奪其馬羅長祐於是夜四鼓亦拔隊前進十一日午正抵阿依阿提令布魯特騎卒馳探令譚慎典等率馬隊繼之囑以追至俄界卽止自駐阿依阿提以待十二日申刻譚慎典等馳抵卡拉阿爾提據布魯特騎卒回報賊首愛克木汗條勒阿布都勒哈瑪共賸百餘騎竄過黑子里達坂已入阿來俄境矣譚慎典始收隊回此外敗賊之竄至畢勒套格依及烏魯阿提者經董福祥

張俊張宗本夏辛酉馬步各營分投搜斬淨盡馬步隊
伍均於十五十六兩日先後撤回原防綜計是役除陣
斬賊首阿希木汗條勒咬買提買賣提斯拉木三名外
並擒斬賊目牌色提十有七曰買木時甘吉曰塔什巴
易曰他什伯克曰開里木曰土魯普曰太呢胡呢曰卜
根胡里曰塔什買提曰買賣提胡里曰亦司瑪儀曰遙
子買賣提曰呼土魯克曰沙底克曰沙悟的曰哈生木
曰滿素爾曰其詳比皆阿古柏舊人也王孜巴什六十
有奇其名難以盡悉總計是役陣斬安集延賊七百有

奇布魯特賊千四百有奇奪獲鎗礮軍械馬匹駝隻無數其漏網之愛克木汗條勒阿布都拉哈瑪現竄俄境已飭沿邊各布魯特總管嚴密偵察其竄人俄境後俄官如何接待應俟劉錦棠偵探確實咨會到臣再行入告竊維南疆邊境與安集延布魯特諸回部壤地毘連犬牙交錯自戡定以來兩部常爲邊患亦由形勢迫切窺伺難防也彼中所號爲汗爲比者君長之稱所號爲條勒者教祖之裔皆部眾素所崇奉者也此次入寇由其汗與條勒號召而來故起事未幾糾集已眾幸劉錦

業調度敏速迅赴戎機於地勢賊蹤瞭如指掌指麾布署悉合機宜所部將領士卒踴躍爭先復能整齊行列以靜制動用克乘其初起速就蕩平不致重煩兵力所履各戰地皆從前出塞之師未嘗經歷者自此邊方諸部應亦稍識

天威計所殺之賊二千數百名而官軍陣亡者已四十餘員名受傷者九十餘員名蓋亦血戰矣所有此次出力各員弁勇丁擬彙入前次截剿陝回及剿辦安集延逆回兩案一併保獎惟按其功次擬保多有逾限制之

外者應顯懇

天恩俯准分別列保以示優異其力戰陣亡之提督銜
總兵李青雲總兵陳大根總兵銜副將沈照階副將銜
參將李春廷參將周桂蘭都司陳松廷孫祥吉守備王
永朝守備銜千總龍碧雲千總張保林周喜祥王銓銜
王益生把總鄒鳳玉朱有福沈福隆羅文燦陳仁十八
員并懇

恩飭部從優議卹以慰忠魂所有官軍剿辦安集延布
魯特寇邊之賊出卡窮追陣斬逆賊渠目克獲大勝驅

圍父安情刑謹據實馳

奏伏乞

皇太后

皇上聖鑒訓示施行謹

奏
光緒五年三月初三日

光緒五年三月十六日內閣奉

上諭左宗棠奏布魯特安集延寇邊官軍進剿獲勝一摺上年安集延賊首阿里達什勾通布魯特逆回阿布都勒哈瑪等竄擾新疆南路邊境經通政使劉錦棠督

軍擊敗阿里達什伏誅後阿布都勒哈瑪等復勾結安集延賊首等內犯劉錦棠審明地勢設計圍攻自本年正月初三日至十二日分布各軍於烏帕爾博斯塘特勒克等處迭獲大勝追至沿邊地方計陣斬賊首三名殺賊二千數百名餘匪逃竄出境奪獲軍械駝馬無數辦理極合機宜劉錦棠運籌決策調度有方用能迅赴戎機實堪嘉尚著賞給白玉柄小刀一把火鏢一把大荷包一對小荷包二箇此次在事出力各員并著照所請彙案分別從優保獎陣亡之提督銜總兵李青雲總

兵陳大根總兵銜副將沈照階副將銜參將李春廷參
將周桂蘭都司陳松廷孫祥吉守備王永湖守備銜干
總龍碧雲干總張保林周喜祥王銓銜王益生把總鄒
鳳玉朱有福沈福隆羅文燦陳仁均著交部從優議卹
欽此

已故軍務人員志節可傳請

宣付史館摺

奏爲已故軍務人員志節可傳伏懇

天恩宣付史館恭摺仰祈

聖鑒事竊維治軍以求才爲急方略必資儒碩經武夙
賴英才蓋必志節著於平時其體已立故事功見於當
世有用必行善觀人者正不在乎事爲之末彼夫工於
辯論惟知獵其華者不足以言儒徒尙氣矜不知養其
勇者不足以言武功名之際志節存焉非華士之彬彬
粗才之猛厲所可襲而取也臣湘水寒生於當世賢豪

少所結識初參戎幕繼領兵符自忖學殖荒陋無補時
艱亦惟藉助同心匡其不逮所與商畧軍事始終攸賴
資志以歿者約有四人其成就之大小志事之顯晦各
有不同而立身本末均有可觀在臣軍營多有裨贊雖
人往風微而回首舊游每耿耿於懷未嘗一日去諸胸
臆謹撮舉梗槩約畧陳之已故內閣中書安徽潁州府
教授夏忻安徽當塗縣人臣前轉戰江皖之交夏忻時
官婺源縣教諭以賊勢方張分起狎至外無援軍婺源
爲程朱系出之鄉先世廬墓在焉士多恪守舊聞素明

禮義地界江皖形勝攸關每馳書告警臣與劉典躬率

所部星往赴援擊賊安民婺源幸免蹂躪夏忻日居營

幕代籌軍食師得宿飽臣入浙督辦軍務餉源久斷

夏忻久宦婺源時遣生徒赴江皖書券乞銀米餉臣軍

比杭城克復夏忻年已七十餘矣猶時來臣軍詳舉兩

浙形勢用兵次第以告蓋乾嘉之間故大學士阮元視

學浙江嗣撫浙平海寇時夏忻均曾襄事幕中故山川

能說閩歷亦多所言多協機宜也所著景紫堂文集於

朱陸同異辨晰頗精同治七年其門人刑部侍郎胡肇

智進呈其恭譯

聖諭十六條附律易解暨所撰檀弓辨証述未質疑等書欽奉

諭旨該員年屆耄耋篤學不倦所繹

聖諭十六條附律易解得周官與民讀法遺意用於講約甚有裨益著刊刻頒發其檀弓辨証述朱質疑均經覽具見其所著述上契

聖衷

臣

前督閩浙時以甫經兵燹幕學久荒地方有司

多屬新進不習法律曾刊發夏斡所繹

聖諭十六條附律易解廣爲傳布移督陝甘重刊之
大經大法易知易從官吏藉有遵循罔敢失墜夏忻之
學有經術通知時事此其徵也前刑部主事王柏心湖
北監利縣人素以文學見重於時爲臣素識咸豐三年
臣從已故署湖廣總督張亮基在鄂王柏心與臣同居
幕中見其籌筆從容算無遺策心誠傾服後張亮基調
撫山東臣與王柏心同舟而歸過其所居過園王柏心
盡發所著錄十數種見示其早年所刻樞言一書於歷
代興亡成敗得失之故言之了然尤多可採時則東南

鼎沸羣盜縱橫王柏心作漆室吟自寫憂憤當事延致
戎幕槩辭不赴胡林翼撫鄂請主荊州講席書緘往復
雖勤然未嘗一詣省會也臣在閩浙音信時通未得一

晤移督陝甘師過黃州郵書訂其漢皋營次一見築營
甫成王柏心適至詢以關隴山川形勢用兵次第及時
務所宜先者王柏心罄所知以告蓋嘗入前雲貴總督
林則徐及前陝甘學政侍郎羅文俊幕徧歷關內郡縣
輿程日記歷歷可稽其於漢回及各種人習俗性情知
之尤審也維時臣去湘已久親故聞臣將有萬里之行

來鄂渚省視言及入關度隴艱險情狀多爲臣危者王

柏心獨不謂然臣爲氣壯後此三道進兵堅持緩進急

戰之議亦王柏心有以啟之其學問深邃識畧超羣足

達其忠愛之意非時賢所易及也旋卒於荊州講舍員

外郎銜中書科中書吳士邁湖南巴陵縣人爲諸生時

專心經濟之學家居洞庭湖畔習見風濤之險舟行有

失眾漁戶乘危劫掠貨財其呼號求救者輒置不顧吳

士邁請於官設救生船創敦善堂拯之全活甚眾劫掠

之風遂絕咸豐二年粵寇犯湖南前湖北撫臣常大醇

議防江不如防湖躬赴岳州延吳士邁主其事吳士邁
傾財誓眾集漁戶千數百分堵入湖諸港口惟鎗礮軍
械領於官長沙解圍賊眾由湘西犯甯鄉益陽出臨資
口漁戶見賊卽遁賊得其空船水陸并進遂陷岳州迅
趨武漢吳士邁收所領鎗礮繳還鄂台謀入城與共存
亡詎尾賊而行江路早爲賊斷比抵金口賊眾已陷漢
陽合圍武昌矣武昌旋陷吳士邁以救援不及爲恨實
則鄂撫未嘗給以文劄委之事權船戶皆倉卒召集未
嘗編列隊目無人鈐束亦未發給餉糧遇賊卽潰非戰

之罪吳士邁乃引爲私戚日夜思所以報

國雪恥者深自媿厲寢處不遑曾國藩胡林翼常遣人
招之令其選徒眾俱來旋失意而返臣入浙時道員李

元度遵前浙江巡撫王有齡檄調赴援率所部安越軍
抵衢州李元度旋擢浙臬杭城陷其軍無所歸謀餉其

急臣奉

命撫浙兵力甚單檄調安越軍助剿會戰時見其中有
稱宗岳營者旂械鮮明行列甚整鏖戰甚力詢其營則
吳士邁所召集與李元度偕行者也李元度以曾國藩

劾去解軍事吳士邁亦歸臣旋由浙入閩粵討賊康平

吳士邁來閩時臣調度陝甘屬其精選壯士同賦西征

吳士邁星夜馳歸仿古束伍法募選入格者以軍法部

勒之滌除營伍惡習身自教督率以入關臣令其駐華

州扼渭水南岸吳士邁斬獲探騎遊賊南竄捻踪甫解

回氛復熾臣於同治六年冬追捻北行吳士邁一軍隸

前署陝撫劉典專剿逆回七年四月臣在吳橋行營得

劉典緘報三水大捷吳士邁烈士苦心數戰大挫兇鋒

厥功尤偉并鈔摺稿送閱保獎員外郎銜

賞戴花翎臣由燕齊回軍調吳士邁度隴剿泰安逆回

破康平堡斬賊目周瑞適逆賊糾合大股由清水竄陝

西隴州寶雞邊界臣慮前漢中鎮李輝武兵力單薄勢

將不支預調吳士邁回軍駐剿吳士邁時患氣陷腹泄

之疾委頓殊甚急起赴之遂獲陳村羅局兩大捷解李

輝武之圍陝撫蔣志章上其功保加四品銜因羅局之

戰所部記名總兵本任浙江處州鎮遊擊朱德樹違其

調度致渠目漏網吳士邁憤甚手及朱德樹徇於軍臣

得報正飭查辦接吳士邁書病勢增劇自稱殆將不起

旋接其營員飛稟吳士邁發函次日已歿於軍次矣

臣

比據寶上陳奉

旨吳士邁業經病故其擅殺朱德樹之案免其查參所
請

給予卹典著毋庸議欽此吳士邁爲人尙志節而重然
諾治軍嚴整廉公有威深自刻勵在營衣粗食淡與下
卒同甘苦臨陣意度安閒堅不可撼軍名益振蓋其微
意所向往者也嘗與人言以洞庭瀟湘往事爲心求爲
憔悴專一之人藉此補答報

國若復希圖利達是負初心每當論功行賞必再三批
辭雖虛銜亦不肯受其特立獨行有如此者翰林院編
修吳觀禮浙江仁和縣人由優貢舉人指員外郎籤分
刑部臣督閩浙時聞其潛心書史內行甚篤調其入軍
練習營務漳州克復全閩肅清吳觀禮相從入粵剿賊
嘉應事畢返閩歸途治漳泉龍岩積匪整飭吏事均資
其籌策嗣隨赴陝西復山晉追賊赴燕齊相與講求陣
法所用惟方圓仰月偃月諸式步兵鎗礮刀矛縮陣居
中騎兵斜布於後張左右翼賊敗則抬陣追之所至成

營師行平原曠野中雖夜深天黑哨隊不亂也吳觀禮

短衣匹馬輒居臣前時或並轡徐行與商戰器傳宣進

止臣深賴之惟素患肝疾兩目汁流不止遇塵塵頓起

則蔽翳益甚中途轉劇兩睛且陷臣勸合少憩就醫吳

觀禮遂辭臣歸檢平臣復返秦吳觀禮目疾漸減嘗作

書寄臣詢訊兵事時臣已度隴駐軍平涼吳觀禮以回

勢尚張急請赴隴襄事臣念其目疾雖幸少愈而隴右

寒苦風塵時起實非所宜商其暫駐西安督辦採運餉

需局務聊資養息俟全愈赴營未晚吳觀禮以從軍而

避勞就逸於義不可乃註銷所保陝西道員官階以原
資赴試復成進士入翰林臣聞喜甚冀其有所建立吳
觀禮心系西事利鈍深以臣擔荷日重衰疾漸臻無分
任勞動之人爲憂臣每詳舉近事告之或雜以諧語釋
其念慮吳觀禮自典蜀試歸應

詔陳言多蒙

採擇雖局外論事容有未及詳審者而直抒所見要本
於忠愛之忱固非建言要譽比也旋聞肝疾舉發歿於
郵寓檢其寄緘時日相距不過旬許而議辨之切意念

之深無殊平昔惜夫未見其止遽賈志以殞也竊慨天
之生材不易士之才而獲底於成卓有表見亦良非偶
若夏斯王相心之嗜學不求聞達志在匡時若吳士邁
之操履堅確行已有恥若吳觀禮之虛心實行懇摯而
有條理皆臣軍所不數觀而或遇之遲暮之年或失之
相需正殷之際該故員等不克多所建樹以竟厥施實
有耿耿於懷不能自釋者可否仰懇

天恩飭將已故奏保內閣中書夏斯刑部候補主事王
柏心四品銜員外郎銜前中書科中書吳士邁翰林院

編修吳觀禮四員

宣付史館以存其人俾士之矜尚志節者有所觀焉於
世教不無小補不勝悚惶待
命之至謹據實具

奏伏乞

皇太后

皇上聖鑒訓示施行謹

奏
光緒五年三月二十二日

光緒五年閏三月二十三日內閣奉

上諭左宗棠奏請將故員事蹟查付史館一摺已故內
閣中書安徽潁州府教授夏忻學有經術洞知時事曾
在營幕代籌軍食師得宿飽已故刑部主事王柏心學
識過人熟悉山川形勢左宗棠督師關隴多資其議已
故中書科中書吳士邁治軍嚴整同治年間隨同剿辦
回匪所向有功已故翰林院編修吳觀禮潛心書史篤
於內行左宗棠治軍閩浙陝西等省深資籌策以上四
員均屬有裨軍務志節可嘉著照所請將該故員等事
蹟查付史館立傳以資觀感欽此

遵 旨開單報銷摺

奏爲同治十三年分軍收支款目遵

旨開單報銷恭摺具陳仰祈

聖鑒事竊臣前因餉需收支款目繁鉅請自同治十三

年正月起截至年底關隴肅清止彙爲一案開單報銷
以重公款而昭核實各情於光緒四年四月初二日專
差具陳六月十七日差弁賞回原摺奉

旨著照所請該部知道欽此比卽恭錄行知各台局欽
遵照辦去後嗣經戶工二部議奏令將此次軍需報銷

各款凡屬例章應准報銷者仍令各台局經手人員逐款造具清冊送部核銷其有不合例章及爲成案所無者既屬事所必需應卽逐款詳晰聲明開單奏報等因具奏奉

旨依議欽此欽遵行文到臣復經臣於四年十二月十七日瀝陳礙難照辦實在情形請仍遵前奉

恩旨一律開單報銷以歸簡易奉

旨著照所請該部知道欽此仰見

聖明軫念邊軍崇尙質實至意下懷欽感莫可自宣茲

據辦理陝甘後路糧台道員王加敏辦理駐陝軍需局
陝安道沈應奎會銜詳稱同治十三年正月初一日起
截至十二月底止一切收支款目彙爲一案收款以奉
撥部帑並各省闕餉商號挪借疾前次單開資存餉
銀爲大宗其次則捐輸稅釐丁課各營兵勇截曠台局
扣收平餘諸雜款與夫穆圖善雷正綰各軍專餉由
統收分撥者內除撥交穆圖善金順自行造報之款暨
撥還前次單開挪借軍餉銀兩一併劃清外茲截至十
三年年底止共管收銀八百二十八萬七千六百四十

五兩七錢六分六厘二毫一絲六忽四微此入款之實數也支款則以馬步各營旗弁勇本年應支口糧暨補發前單積欠弁勇口糧以及津貼各營糧料價值爲大宗次則水陸轉運船隻車駝夫騾腳價撥解餉銀滙費又次則採辦軍裝軍火旗幟號衣帳棚洋鎗洋礮子藥銅帽以及車騾鞍屨什物等項又次則各軍卹賞養傷屯墾經費漢回安插賑濟州縣津貼辦公等費商號利息各款又次則隨營辦事各台局當差員弁薪水書役工匠護勇長夫口糧紙張油紅各等項通截至十月廿

三年年底止共支銀八百一十七萬八千九百八十二兩九錢六分七厘三毫七絲八忽六微此出款之實數也以出抵入常存銀一十萬八千六百六十二兩七錢九分八厘八毫三絲七忽八微應歸光緒元年正月以後支用造報而欠發十三年分並前單欠發之款各營軍餉則實欠銀八百四十五萬三千二百八十二兩一錢四分三毫五絲八忽一微各營傷亡弁勇卹賞養傷則實欠銀三十六萬六千六十兩六錢七分二厘二毫又欠發十二年年底以前借款並此次入款項下列收

各處挪借及預交滙餉各項銀二百三十五萬三千一百九十兩二錢四毫一絲六忽一微均係實欠應還之款應統俟光緒元年正月以後收到協餉陸續撥還另案造報以清界限據王加敏沈應奎等開具清單詳請核明具

奏前來臣維此案報銷所以再懇一律開單者誠以分別造冊必欲強符部章挪湊牽合自蹈欺朦不如披瀝直陳核實開報實事求是之爲簡易也幸荷

聖慈洞鑒愚忱俯如所請茲據該台局欽遵辦理開單

會詳到營臣覆核無異謹遵

旨將同治十三年正月初一日起至年底開臨肅清日
止收支各款彙爲一案繕具簡明清單恭摺敬呈

御覽懇

恩飭部核銷其自光緒元年正月起至光緒三年十二
月底回疆肅清之日止已飭該台局彙爲一案接續開
單以憑矣

奏伏乞

皇太后

皇上聖鑒訓示施行謹

奏光緒五年四月十一日

軍機大臣奉

旨該部知道單併發欽此

疊奉

恩旨出示曉諭摺

奏爲疊奉

恩旨欽遵出示曉諭恭摺覆陳仰祈

聖鑒事竊臣於光緒五年四月初七日承准軍機大臣
字寄光緒五年閏三月二十四日奉

上諭崇厚奏遵查邊境滋事匪徒與俄國商辦情形一
摺據稱逃匿俄界之回匪分道寇邊經俄國外部尙書
格爾斯面稱此項人眾並非俄國之人路票內寫明地
方係在界內不料其越界滋事現已知照各邊界認真

查禁嗣後越界滋事之人任聽中國辦理等語卽著左
宗棠金順隨時相機妥爲籌辦至照會中有中國將回
人赦免准其回籍一節自係指未經滋事良善回民而
言並著左宗棠酌度情形出示曉諭其首要各逆及怙
惡不悛者固爲法所難寬其洗心遷善情有可原者自
應分別辦理以示勸懲等因欽此臣維伊犁本準部故
地乾隆間戡定以後番族寢微回部民人羸雜其間苗
裔雜眾伊犁居人除旗綠各營及各台漢回商民遣犯
外一爲纏回由南疆轉徙而來遂成土著一爲本地土

回則伊犁各城舊有種族一爲陝回係近時官軍克復各城後畏剿逃避伊犁俄官竄之綏定城要而言之纏回性多良懦本無悖逆重情陝回敗亡之餘避地逃生亦非別有詭計前聞陝回楊萬勝趙全福等自伊犁來投金順令其轉相招致導以撫局其成與否尙未接據續報然其就撫固在意中茲聞伊犁交還有日纏回陝回兩種當可無他惟土回被脅已久自恐難邀曲貸其心懷反側在所不免俄人之請將回人赦免准其回籍似專指陝回言之惟頻年辦理回案原係欽遵

諭旨剿撫兼施而陝西漢民與回仇怨既深就撫陝回
萬難復歸故土故歷次辦理撫局槩將陝回安插甘境
其甘回之就撫者亦令遷移甘轄附近郡縣與漢民異
處俾耦居無猜各得其所庶幾日久相安

諭旨飭臣酌度情形出示曉諭比卽欽遵出示並會伊
犁將軍金順前銜恭錄徧行曉諭其洗心遷善情有可
原者准分別辦理並咨行軍營文武凡緣認馬械傾誠
就撫者人關安插不得留難阻滯以廣

皇仁惟示稿中於首要各逆及怙惡不悛者固爲法所

難寬一層未及備錄恐啟猜疑甫於四月十七日由驛
分行馳遞旋於十八日欽奉四月初七日

諭旨伊犁回人從前被賊迫脅未能自拔情尚可原其
被脅人眾概可從寬免罪予以自新著左宗棠明白曉
示並飭帶兵員弁收城之日不得妄行殺戮以示法外
施仁至意等因欽此遵於四月二十一日仍會金順前
街恭錄

諭旨曉示伊犁回民人等一體知悉安堵無恐勿得懷
疑觀望自外生成各路帶兵員弁收城之日不准妄行

誅戮致千軍律竊維兵事不外剿撫兩端而撫倍難於
勦勦者一時利鈍成敗之分當幾可以立斷撫則恩信
爲主非實厚不足以示包荒而安反側之心亦非威權
不足以示區別而爲久遠之計特輕重緩急次序攸分
辦理偶失其宜則勸懲之用將有時而窮人雖至愚無
不知貪生而畏死使其倖逃顯戮固貽異日隱憂使其
因疑懼而惑眾生端尤慮變生不測智欲其深勇欲其
沈固未能責其效於旦夕間也臣當與金順頤以圖之
諭旨收城之日不准妄行誅戮各路帶兵員弁應卽懾

邇惟受撫之際每因兵勇搜求財物致起事端尤宜嚴
明紀律以免有所藉口臣當分別咨行轉飭各員弁一
體遵照毋准違犯以明軍律謹將遵

旨出示並擬辦情形據實馳陳伏乞

皇太后

皇上聖鑒訓示施行謹

奏光緒五年五月初三日

軍機大臣奉

旨知道了該督既出示曉諭自足以安回眾之心將來

收城之日仍當會商金順約束兵勇毋致別啟事端所
有投出人眾如何安插之處並著妥籌辦理欽此

恪靖奏稿續編卷七十五目錄

請

飭催趕解協餉摺

漏逸逆酋糾眾窺邊現籌防剿摺

賊酋犯邊進剿大勝摺

請令劉錦棠幫辦軍務

遵旨開單報銷摺

請

飭部查照原單覈銷片

各省關籌解協餉各員併案請獎摺

新疆蕩平出力員弁彙案保獎摺

請 飭催趕解協餉摺

奏爲 臣 軍存餉將罄亟籌接濟請

旨飭催各省關將應協西征新餉提前趕解以濟要需
俾免籌借商款致耗重息恭摺馳陳仰祈

聖鑒事竊 臣 軍餉項上年奏蒙

天恩准借華款銀三百五十萬兩今春陸續撥解到甘
半年以來藉資支展惟關內外征防各軍月需薪糧及
陸續裁汰弁勇清釐欠餉款目甚鉅新疆甫經收復籌
辦一切善後事宜需費又急卽後路各臺局採買轉運

經費亦屬不貲兼代河南山西墊發張曜金運昌兩軍
餉糧運費而金順恭鏗長順每因專餉未到亦時向臣
挪借又不能不通融挹注共濟時艱查各省關應協西
征軍餉截至六月底止連閏七箇月應協十成銀四百
四十一萬餘兩除已解銀二百七萬餘兩外實欠解銀
二百三十四萬餘兩卽各省已經報解之二百七萬餘
兩內除劃還華商兩款銀一百一十餘萬兩外其實在
轉解來甘者尙不及一百萬兩計上年至今關外楚湘
蜀皖各軍陸續裁撤歸併者約已減去九營關內隨時

裁撤歸併者約在十營以外此外因存餉無多未能再
議裁併現在各省關續解之餉既屬寥寥而前借華款
業經告罄若再向華商續籌息借未免耗費鉅款臣等
往復函商通盤籌算秋冬之交非大批協餉解足難資
周轉檢查各省關協餉數目除山東已提前解至六年
六月分山西現應停緩不計外其餘廣東福建浙江江
西江蘇安徽湖北湖南河南四川閩海粵海江漢各省
關欠解甚多應請

旨飭下督撫將軍臣欽遵光緒四年十二月十五日欽

奉

諭旨各該省應協左宗棠月餉自光緒五年起三年內均按十成數目報解俾資應用等因提前起解大批協餉務於年內一併到營庶資接濟如省關協餉仍不能以速補遲則臣等無法可施勢不得不就湖北陝西向華商續籌息借以措時局而息耗一項將來無款抵補又成積欠之根臣等再四籌維實有難以措置者除將各省關欠餉數目開單咨部外謹專摺馳陳伏乞

皇太后

皇上聖鑒訓示施行謹

奏
光緒五年八月初四日

軍機大臣奉

旨著戶部查照左宗棠等咨行單內所開各省關欠餉數目迅速咨催務令提前趕解大批於年內解到該營以濟急需欽此

漏逸逆酋糾眾窺邊現籌防剿摺

奏爲漏逸逆酋糾眾窺邊現籌防剿情形恭摺陳仰
祈

聖鑒事竊喀什噶爾今正大捷逆酋愛克木汗條勒阿
布都勒哈瑪與敗殘餘眾數十人竄遁俄境阿來地方
五月內被俄官驅逐該逆酋等因俄不見容遂由阿來
竄出越愛克什塔木俄國邊卡踞我外卡之外以跟地
方自言無地逃生卑詞懇請安集延布魯特各回助其
竊踞邊城暫延喘息回眾中喜事無賴之徒轉相勾煽

加以誘脅從亂者漸多六月十七日竄至烏魯克恰提

嗣後渡河而南招致回部意在窺邊

臣

接道員羅長祐

緘告比於八月十一日覆陳摺內附敘及之旋接通政

使二等男臣劉錦棠七月十四日咨報所敘賊情賊蹤

與羅長祐無異而布置一切較爲詳明按烏魯克恰提

距喀什噶爾約七百里中隔戈壁賊由烏魯克恰提南

竄則必出烏帕爾西南竄則必出巴勒庫爾以兩地水

草均便多產糧料人馬足供故也劉錦棠先派羅長祐

率馬步赴烏帕爾修築堅壘留副將劉必勝步隊總兵

夏辛酉馬隊駐守扼之飭西南沿邊各布魯特徙帳內地避賊裹脅劉錦棠按兵喀什噶爾擬伺賊所向急起擊之嗣復接劉錦棠七月二十五日咨報阿布都勒哈瑪由烏魯克恰提翻山而南向色勒庫爾竄走後兩日愛克木汗由烏魯克恰提踰河而南越買勒克蘇明特蓋等處復向西南竄走是其併趨色勒庫爾圖與阿布都勒哈瑪合股無疑劉錦棠派羅長祐率步隊三旂留守喀什噶爾漢城總理後路防守事宜總兵杜錫斌率所部董字左營步隊駐紮回城並飭提督李克常副將

劉必勝等仍常駐紮以重邊防布署已定七月二十六日劉錦棠親率馬步二千有奇由喀什噶爾向色勒庫爾進發沿途如別無戰事計旬日內可到地接仗容俟續報到時再行馳

奏竊維新疆北路壤接哈薩克布魯特南疆則與安集延布魯特各部落毘連此次賊竄色勒庫爾地屬葉爾羌邊境在喀什噶爾西南種人雜錯其間最易煽動非迅于殲夷則展轉勾結必致重煩兵力劉錦棠料賊所必出之途而急起乘之者以此所幸賊蹤經歷皆山谷

崎嶇官軍由卡內追擊道路稍夷如履衽席差爲得算
至若新疆地方因俗施治政教未行愚回信奉其汗比
條勒已成錮習非革除舊俗漸以華風望其長治久安
事有難言者微臣之妄擬改設郡縣亦以此擬俟北路
底定再會議請

旨遵行謹將逆酋窺邊官軍馳剿情形據實陳
奏伏乞

皇太后

皇上聖鑒訓示施行謹

奏光緒五年九月初三日

軍機大臣 字寄光緒五年九月十七日奉

上諭左宗棠奏漏逸逆酋糾眾窺邊現籌防剿情形一
摺逆酋愛克木汗條勒阿布都勒哈瑪勾煽黨眾由烏
魯克恰提分竄併趨色勒庫爾劉錦棠已率馬步各隊
前往剿辦著左宗棠督飭該京卿相度機宜奮勇進剿
務將此股賊匪剋日殄除毋任勾結該處種人蔓延爲
患一面飭令防軍嚴加防範以杜竄擾不得稍有疏虞
至新疆地方愚同錮習未除自應規畫久遠移其風俗

俾就範圍該大臣所擬改設郡縣應如何辦理之處并
著妥籌具奏將此由五百里諭令知之欽此

賊首犯逆進剿大勝摺

奏爲漏逸賊首糾眾犯邊經官軍進剿大獲全勝所有
尤爲出力文武及陣亡各員弁願懇

天恩從優獎卹恭摺馳陳仰祈

聖鑒事竊布魯特賊首阿布都勒哈瑪安集延賊首愛
克木汗條勒等率眾竄竄_逃勒庫爾通政使二等男_臣
劉錦棠親率馬步二千餘人定於七月二十六日啟行
前往剿辦所有進兵情形經_臣具奏在案茲准劉錦棠
九月初二日來咨稱七月二十五日據色勒庫爾阿奇

木怕克阿布都勒哈山等稟報前來探得賊股竄至蘇
巴什地方距色勒庫爾祇有一站因飭伯克素唐夏等
在城防守一面帶同伊什罕伯克米爾子咬克木等並
居民二百出城扼紫蘇巴什南面該賊探知要隘已扼
卽繞由間道踰嶺而來十九日大股已抵城下約三千
餘人將城圍住所撥大兵援剿劉錦棠以色勒庫爾城
小而堅尙易固守但阿奇木伊什罕等均隔在城外恐
城內各回目與居民不無驚惶該處設有疏虞剿辦較
爲棘手又以師行糧隨路險不能容車且聞沿邊布魯

特各族被脅者多其尊崇條勤之教聞風響應者尤復不少自英吉沙爾出卡皆布魯特支帳之所爲運道所必經難保中途無梗因飭各營裹帶二十日行糧並飭喀什噶爾英吉沙爾各局星夜雇驢裝運糧料一並飭行劉錦棠二十六日督隊由喀什城啟行二十七日抵英吉沙爾適前調之管帶壽字馬隊提督陳建厚率隊前來卽飭暫駐英城次日復飭提督張俊提督石蘊玉率定遠中右步隊兩營並提督胡登花率定遠左營五成隊伍帶同進剿仍留該營五成隊伍會同壽字營一旗

馬隊駐守英吉沙爾城垣八月朔日過叟齊牙克達坂抵哈引恰提地方接據色勒庫爾守城明伯克素唐夏等稟報連口賊眾環攻率居民同心堅守二十六日早賊酋派人到城下誘降伯克等以阿布都勒哈瑪在賊酋中素稱兇狡非設計擒斬不可乃僞許其降約阿布都勒哈瑪前來定議阿布都勒哈瑪信之旋即親詣城下該伯克等預選二十餘人各帶軍器出城與阿布都勒哈瑪相見數語後玉子巴什蘇乃滿等即將該酋馬韁扭住阿布都勒哈瑪知已中計拔刀砍落蘇乃滿數

指撥馬狂奔幸二十餘人中有名豁罕者開鎗擊洞該
首背心卽時落馬而同去各人同時開鎗排擊斃賊七
名餘賊飛奔伯克等割取阿布都勒哈瑪及七賊首級
入城賊黨忿甚攻城愈急盼官軍往救等情劉錦棠得
報改道由山路急進因巖壑崎嶇勢難迅速初三日趨
行百餘里至勤的克地方探報色勒庫爾之賊聞官軍
將至已於二十九日向北竄去初四日又改道北趨踰
卡拉塔什達坂至秦爾里安調賊於初二日已竄至布
倫可地方布倫可者西南距色勒庫爾約四站距秦爾

里安約兩日程劉錦棠以賊既相距四站若不覓路繞
追必難及賊比令董宇中右兩營定遠中左右三營各
步隊及靖營馬隊西征馬隊一旗暫歸提督董福祥節
制於初五日四鼓兼程先進自率總理營務處知府袁
奎齡督飭總兵各哨並總兵侯名貴砲隊一旗提督譚
慎典白旗馬隊一營提督楊金龍之恪中馬隊一旗軍
功何振元之防勇步隊一旗及纏回各馬隊護衛輜重
亦於是日辰刻繼進初十日行抵察哈爾良壘接董福
祥稟報初五日抵紫克牙哈奇初六日午刻至察哈爾

良獲賊探一名訊據供稱賊蹤相距六七十里董福祥擬乘夜襲之飭各營小憩申刻銜枚疾馳夜分至彼賊已聞信竄去初十日早追至空台根滿斯忽見前面有賊三十餘騎向木吉一路狂奔並見所宰牛馬鮮血滿地知賊去不遠念官軍兩日一夜馳三百數十里人馬勞乏甚矣然不猛進賊更遠颺遂挑步隊之健者乘隊驟隨同馬隊追逐派提督張俊率之先進董福祥率疲乏步隊護輜重繼進酉刻據張俊馳報是日午後追至木吉探賊大股麇聚距木吉六七里地方解鞍秣馬張

俊整隊徐進自率數十騎登高瞭望見前面峻嶺夾峙大河貫入谷口賊見東南塵起知我軍追至遂列隊河南分數十團每團數十百騎依山對河按次排列令總兵夏辛酉提督張宗本率西征一營一旗馬隊擊其左總兵田九福之董左營爲接應提督方友升率靖營馬隊擊其右提督胡登花石蘊王之定遠左右兩營爲接應自率董中營定遠中營隊伍由中路擊之鏖戰半時勝負未分忽有一綠衣賊酋手執紅旗在前指揮掉陣勢甚兇悍被我馬軍鎗轟落馬賊遂大敗官軍掩殺約

二里許賊復回拒張俊嚴飭各營整隊奮擊斃賊多名
該逆仍死拒不退夏辛酉張宗本方友升等各分哨由
左右兩路繞出其前自率馬隊直貫賊陣張俊又率所
部由中路奮威衝殺人自爲戰無不以一當十賊方窘
蹙至極時復見官軍左右抄截去路將斷遂大潰狂奔
官軍乘勝追至卡拉阿提地方時已天晚遂收隊就地
爲營是夜四鼓張俊仍率隊猛追初八日午刻又復及
賊沿途賊尸枕藉初九日直追至黑子拉提達坂下該
逆僅剩百餘騎翻山亂竄張俊等以過山卽係俄屬阿

來地界乃止不追方賊在木吉西面爲官軍擊敗時張
俊等正追賊向前董福祥率隊進至該處遙望谷口有
馬馳出瞥見平川內有賊約二三百牛羊二三千知爲
賊眾所擄在後留牧者董福祥麾隊猛擊賊眾翻山紛
竄官軍急追悉數斬之計是役共殺賊二千數百名奪
上軍械旗幟千數百件馬匹牛羊數百頭生擒悍賊六
十三名內有胖子提買賣提巴巴一名玉子巴什十五
名陣斬著名胖子提曰買賣賽亦提曰阿子曰亦薩克
曰白奇巴圖魯曰阿里必曰開拜克拉八和洛曰毛拉

和買提曰邁提哈力克曰可坎乎完提曰托乎大曰克
力恰克等十一名其買賣賽亦提卽前安夷帖夏阿古
柏派克喀喇沙爾大通哈者也其生擒之買賣提巴巴
者卽阿古柏派克烏什大通哈者也至陣斬玉子巴什
據稱有六十餘名難以悉數此八月初五至初九等日
馬步各營追剿疊獲大勝之實在情形也劉錦棠以餘
賊業經過山追亦無及遂飭各馬隊由阿依阿提達坂
回防自率各步隊由碧勒可斯達坂回防以色勒庫爾
伯克等固守城池並能誘殺巨酋厥功甚偉而城外莊

稼牲畜被賊劫掠殊可矜憫因飭提督楊金龍攜帶銀兩緞疋率恪中營馬隊馳赴該王酌給犒賞以示激勸安撫事竣卽由田角塔回防緣山內道路紛岐卽各城纏回亦未嘗經歷故飭馬步各隊分路行走兼察地勢其逆酋阿布都勒哈瑪首級經楊金龍解至喀城當傳飭本地纏回與該逆素識者驗明傳首示眾除將生擒之買賣提巴巴巴色提等六十三名訊明斬梟外其餘逆之布魯特頭目庫彌什豁坎等二名已經按名拿獲解營候訊明分別辦理查阿布都勒哈瑪與愛克不汗

條勒兩次糾眾犯邊狡猾兇頑愍不畏死此次率黨竄至烏魯克恰提卡外聲言奉俄國號令攻取喀英谷城煽惑部眾及聞官軍布置嚴密無隙可乘遂變計往攻色勒庫爾冀取該處爲老巢爲復擾回疆張本劉錦棠聞報督隊疾馳踰越重疊達坂鑿冰開道冒險以行方擬進至伊犁克雅克地方截其歸路便可聚殲詎該逆偵知官軍進剿先已北趨當官軍行抵秦爾里安之日賊於前兩日已過布倫可地方方按程計日相距數站雖派隊急追竊恐未能及賊幸董福祥張俊等迅厲無

前士氣競奮四晝夜馳八百餘里人未交睫馬未卸鞍
接仗時猶復倍加抖擻愈接愈厲卒能殄此狂寇大振
軍威惟此次師行所至率皆荒蕪阻絕自來人跡罕到
之區石壁冰梯直插霄漢鳥道陡絕士馬均須猱附而
升俯視幽壑冥冥渺不見底加之煙霧嵐瘴濃濁殊常
中者不省人事致弁丁之染患急證者多而戰馬糧馱
之墜崖而斃及勞傷以死者更難數計蓋自出關以來
行軍之艱阻勞瘁未有若斯之甚者也嗣接探報愛克
木汗條勒竄至俄境阿來所屬可苦蘇地方隨行僅三

十餘人內有受重傷者五人可苦蘇北通安集延西通
哈拉替根俄人將愛克木汗條勒如何安置之處應俟
探明續報臣竊維新疆邊患以布魯特安集延爲最劇
以壤地交錯易致衅端也而布魯特之汗互相雄長安
集延之條勒爲回族所崇信故汗與條勒一有煽動內
地回眾卽靡然從風轉相勾結星星之火足以燎原非
乘其初發急起撲之不可也劉錦棠自克西四城後上
年速剿陝回金山去冬今春兩剿安集延布魯特各逆
此次復剿阿布都勒哈瑪愛克木汗條勒用兵不越旬

時渠目幾無漏網而內地各城得安堵如故雖火無驚者則審機之明赴機之速有以啟之臣前奉以賊由外卡之外繞攻色勒庫爾地勢崎嶇劉錦棠由喀什噶爾英吉沙爾邊境以援色勒庫爾程途較爲坦易不料賊攻堅城不下逆酋中計授首羣賊聞官軍驟至擁愛克木汗條勒狂奔避官軍而北竄劉錦棠指麾各營改由北路前截後追備嘗艱阻卒以蔽役愛克木汗條勒雖曠二十餘人遁竄俄境死灰難以復然亦概可見矣所有此次及前次速剿陔回金山及去冬今春兩剿安集

延布魯特共四案尤爲出力文武員弁兵勇謹擇其尤者併爲一案繕具清單恭呈

御覽伏乞

天恩逾格准獎以示優異此外出力將士猶多應歸另案保獎庶足勵士氣而播

皇威而偉伐遐宣可增史牒之光亦可靖兵戎之氣其力戰陣亡者除勇丁四十六名已經賞卹外所有前三案擬保之副將銜補用參將王克德補用遊擊林相補用都司余繼康藍翎守備銜千總并養成辛金擬保守

備黃龍耀千總賈福堂藍翎把總謝占鰲趙連珠趙鳳
祥楊義林李成義蕭德春尙廷珍擬保藍翎把總王新
臣劉全成劉出發湛意誠藍翎外委沈福橋等並懇

天恩飭部照擬保官階從優議卹以慰忠魂所有剿辦
邊寇大獲勝仗情形謹會同幫辦甘肅新疆善後事宜
前浙江撫臣楊昌濬據實馳陳仰祈

皇太后

皇上聖鑒訓示施行謹

奏

光緒五年十月十一日

光緒五年十月十四日內閣奉

上諭左宗棠奏賊酋糾眾犯邊官軍追剿獲勝請將出力陣亡各員懇恩獎卹一摺布魯特賊首阿布都勒哈瑪安集延賊首愛克木汗條勒等疊次糾眾犯邊本年七八月間竄至烏魯克恰提聲言攻取喀什噶爾等城復圍攻色勒庫爾經通政使劉錦棠督率官軍節節追剿先將阿布都勒哈瑪誘斬並生擒買賣提巴巴胛色提等多名內地各城悉已安堵剿辦尙爲得手所有此次並疊次剿辦陝回金山及安集延布魯特各逆出力

員弁均屬著有微勞自應量予獎勵單開之道員羅長
祐前經賞給雲騎尉世職著改爲騎都尉世職提督董
福祥張俊均著賞給頭品頂戴並賞給三代正一品封
典擬保道員袁珪齡著賞給那爾琿巴圖魯名號並賞
給二品封典提督張宗本著賞穿黃馬褂總兵夏辛酉
著交軍機處記名遇有提督總兵缺出請旨簡放並賞
給三代正二品封典方友升均著遇有提督總兵缺出
儘先題奏胡登花等均著賞給頭品頂戴總兵杜錫斌
田九福侯名貴均著交軍機處記名遇有提督總兵缺

出請旨簡放侯名貴並賞給三代正一品封典提督湯
彥和張春發均著交部照例從優議敘楊金龍
著賞換年常阿巴圖魯名號並賞給正一品封典李克
常著交部照頭等軍功從優議敘陳建厚著交部從優
議敘擬保副將劉必勝著免補副將以總兵交軍機處
記名遇有缺出請旨簡放提督段伯溪等均著交部照
頭等軍功從優議敘李清貴等均著賞給頭品頂戴劉
長其等均著賞給正一品封典張果著賞換依伯德恩
巴圖魯名號王賢俊著賞換哈希巴巴圖魯名號王春

發著賞換噶爾薩巴圖魯名號總兵查春華著交軍機處記名遇有提督總兵缺出儘先題奏李全忠等均著交軍機處記名遇有提督總兵缺出請旨簡放李全忠並賞給壯勇巴圖魯名號陳錦泰等二員並賞給正一品封典楊勝魁等均著免補總兵以提督交軍機處記名遇有提督總兵缺出請旨簡放並賞給正一品封典周天財等均著賞給正二品封典周天財並賞換芬臣巴圖魯名號許獻德並賞換都隆額巴圖魯名號擬保總兵周義發著賞加提督銜並賞給正一品封典總兵

胡少章著侯補總兵缺後以提督升用並賞換奇穆欽
巴圖魯名號副將姚建仁等均著免補副將交軍機處
記名遇有總兵缺出請旨間放姚建仁等二員並賞給
正二品封典周龍涓等四員並賞加提督銜張瑞揚並
賞換博多歡巴圖魯名號擬保副將羅雲義等均著免
補副將交軍機處記名遇有總兵缺出儘先題奏羅雲
義並賞加提督銜溫振和並賞換喀勒春巴圖魯名號
副將柴典漢等均著免補副將交軍機處記名遇有總
兵缺出請旨簡放並賞給正二品封典擬保副將何有

道著免補副將以總兵遇缺儘先題奏並賞給穆特本
巴圖魯名號唐加奇等均著免補副將交軍機處記名
遇有總兵缺出請旨簡放參將劉占學等均著免補參
將以副將遇缺儘先推補並賞加總兵銜劉占學並賞
換蘇呼巴圖魯名號擬保參將胡德超著免補參將以
副將仍留原省儘先推補並賞加總兵銜賞換額騰依
巴圖魯名號米漢璋等均著免補參將以副將遇缺儘
先推補並賞加總兵銜米漢璋並賞給確勇巴圖魯名
號參將余福章等均著免補參將以副將遇缺儘先推

補並賞加總兵銜內路長德並賞給利勇巴圖魯名號
林志魁並賞給拔勇巴圖魯名號莊偉著免補參將以
副將仍留福建儘先推補並賞加總兵銜擬保參將張
泰善等均著免補參將以副將仍留各原省遇缺儘先
推補張泰華並賞加總兵銜徐積誠並賞給信勇巴圖
魯名號副將魏其德著以副將留於甘肅遇缺儘先推
補賞給直勇巴圖魯名號並正二品封典擬保游擊李
景隆著免補游擊參將以副將仍留原省原標遇缺儘
先補用並賞給鋒勇巴圖魯名號沈陔西等均著免補

游擊參將以副將遇缺儘先補用沈凌西並賞給克勇
巴圖魯名號張廷臣並賞給桓勇巴圖魯名號楊繩武
並賞給因勇巴圖魯名號張天有馮滿盛並賞換花翎
游擊賈永清等均著免補游擊以參將留於陝甘遇缺
儘先推補並賞加副將銜賈永清並賞給銳勇巴圖魯
名號王天珍並賞給果勇巴圖魯名號擬保游擊文福
祥著免補游擊參將以副將留於陝甘儘先推補吳照
庭著免補游擊以參將遇缺儘先推補並賞加副將銜
游擊俞尙智著免補游擊以參將留於甘肅遇缺儘先

推補並賞加副將銜賞給綽勇巴圖魯名號郝忠齋著
免補游擊以參將仍留原省遇缺儘先補用並賞加副
將銜賞給揚勇巴圖魯名號擬保都司張士德等均著
免補都司游擊以參將遇缺儘先推補張士德並賞加
副將銜雷登科並賞換花翎李生榮著免補都司以游
擊留於陝西儘先補用並賞加參將銜楊大鵬著免補
都司以游擊遇缺儘先推補賞給勉勇巴圖魯名號間
戰彪著免補都司以游擊儘先推補並賞加參將銜擬
保守備汀鏡堂等均著免補守備都司以游擊儘先補

用內楊紹寅並賞換花翎白重陞著免補守備以都司
儘先補用並賞換花翎廖克明等均著免補守備以都
司儘先補用廖克明並賞給武勇巴圖魯名號王義圃
並賞給剛勇巴圖魯名號方綬德著免補守備以都司
儘先補用並賞加游擊銜田品堂著免補守備以都司
遇缺儘先補用並賞給捷勇巴圖魯名號擬保千總何
振元著免補千總守備以都司留於陝甘遇缺儘先補
用擬保把總陳金玉著免補把總以千總留於甘肅儘
先拔補並賞加守備銜賞換花翎擬保千總劉占魁等

均著免補干總以守備留於甘肅儘先補用軍功劉其
相著免補外委把總以干總儘先拔補並賞加守備銜
巡檢曠肇勳著免補本班以縣丞仍分發省分歸候補
班前補用所請將已革總兵楊德俊開復原官翎枝勇
號仍交軍機處記名遇缺簡放並免繳捐復銀兩之處
著該部議奏陣亡之擬保副將銜參將王克德游擊林
相都司余繼康守備銜干總井馨成辛全擬保守備黃
龍輝干總賈福堂把總謝占釐趙連珠趙鳳祥楊義林
李成義蕭德春尙廷珍擬保把總王新臣劉全成劉忠

發湛意誠外委沈福橋均著照擬保官階從優議卹餘
著照所議辦理該部知道單併發欽此

請令劉錦棠幫辦軍務片

再通政使司通政使二等男法福靈阿巴圖魯臣劉錦
棠出關以來克復各城勳績丕著曷堪蒙

天恩不次擢用

優加賞賚遐邇聞知同深感服其現辦善後事宜因地
施治寬猛得宜吏畏民懷已覩成效洵一時傑出之才
非臣衰庸所能及也維邊方之任非賢能不足宏謀遠

謨亦非重其事權不足舒其蘊蓄惟威名日久疑謗易
滋無以寒遠人之膽又飛鳥未盡良弓已藏足跡在事
之氣區區愚忱不敢不盡伏懇

天恩併案論功將劉錦棠

優賞欽差銜

飭令幫辦新疆北路軍務以彰

殊眷而資鎮壓之處伏候

聖裁仰乞

慈鑒訓示施行謹

奏

軍機大臣 字寄光緒五年十月十四日奉

上諭左宗棠奏請飭劉錦棠幫辦新疆北路軍務等語
通政使劉錦棠自收復南路各城後辦理一切善後事
宜俱臻妥協現在布魯特安集延等眾屢次竄擾邊境
南路防務尙未能鬆劉錦棠駐紮該處正資鎮撫且金
順幫辦軍務本係統兵駐紮北路茲左宗棠請飭劉錦
棠幫辦北路軍務是否另有命意所在著卽據實詳細
覆奏再降諭旨將此由六百里諭令知之欽此

光緒六年正月內閣奉

上諭通政使司通政使劉錦棠著幫辦新疆軍務欽此

遵 旨開單報銷摺

奏爲光緒元年正月初一日起三年十二月底止軍需收支款目遵

旨開單報銷恭摺具陳仰祈

聖鑒事竊臣前以西征軍需收支款目繁鉅部議分別造冊開單礙難照辦瀝陳實在情形請自同治十三年正月起截至光緒三年十二月底回疆肅清止分作兩案一律開單報銷以昭核實而歸簡易各情於光緒四年十二月十七日拜摺具陳本年三月初四日差弁賈

回原摺奉

旨著照所請該部知道欽此當於本年四月十一日將同治十三年分收支各款彙爲一案欽遵開單專摺奏部奉

旨該部知道單併發欽此跪聆之下仰見

聖明崇實黜浮至意下懷欽感莫可名言茲據辦理陝甘後路糧台湖南補用道王加敏辦理駐陝軍需局署理陝西按察使陝安道沈應奎會詳稱光緒元年正月初一日起截至三年十二月底前疆肅清止一切收支

款目錄爲一案收款則以奉撥部帑并各省關協餉洋商借款商號那借及前次單開實存餉銀爲大宗其次則捐輸稅釐丁課各營兵勇截曠台局扣收平餘諸雜款與夫穆圖善雷正綰各軍專餉由臣統收分撥者內除撥交穆圖善金順英翰明春自行進報之款及解交烏里雅蘇台借用西征糧台餘存駝價以及撥還前次單開此案劃借軍餉銀兩一併劃清外茲截至三年十二月底止共管收銀正千六百七十四萬五千九百三十二兩五錢九分六釐一毫五絲九忽六微此以款之

實數也支款則以馬步各營旂弁勇歷年應支口糧及補發前單積欠口糧以及津貼各營糧料價值水陸轉運腳價撥解餉銀匯費爲大宗次則採辦軍裝軍火旂幟號衣帳棚洋鎗洋礮子藥銅帽以及車騾鞍履什物等項又次則商號利息隨營辦事各台局當差文武員弁薪水書役工匠護勇長夫口糧紙張油紅等費又次則各軍屯墾經費漢回安插賑濟津貼州縣辦公奉差員弁川資傷亡員弁勇卹賞各等項通截至光緒三十一年十二月底止共支銀二千六百四十五萬二千六百三

十兩九錢三分八釐六毫二絲五忽二微此出款之實數也以出抵入應存銀二十九萬三千二百九十兩六錢五分七釐五毫三絲四忽四微歸光緒四年正月以後支用造報而本案欠發及前單積欠之款各營軍餉除裁撤歸併各營註銷欠餉不再補發外實欠發銀四百三十八萬一千九百一十六兩七錢一分一釐九毫六絲八忽七微各營傷亡弁勇卹賞養傷則實欠銀三十一萬四千三百九兩五錢四分七毫三絲八忽二微又欠發此次入款項下列收洋商及各台局郡借各款

銀六百七萬五千八百兩均係實欠應還之款應統俟光緒四年正月以後收到協餉陸續發還另案造報以清界限據王加敏沈應奎等開具清單詳請核明具奏前來臣維此案報銷分年攤計用款比之歷年爲數較多誠以大軍遠征荒徼萬里轉輸致一鍾而費十鍾每糧一石運至軍前積價至數十金卽軍裝軍火等件無不運價倍於採價此脚價匯費一項較前案加多之實在情形也至華洋各商號利息多於前案幾將十倍蓋由本案協餉不時那借過多以致息銀積成巨款其

弁勇口糧製造軍火文武員弁薪水屯墾經費等項均較前案略有加增則以出關後各營不扣糧價新疆關地日廣捍衛藉資器械辦事需員克復城池隨地安插戶口時勢不同事難畫一業經另片陳明在案臣職兼度支惟有隨時隨事力求核實以期仰副

宸衷茲據該台局開單會詳到營臣覆覈無異謹遵

旨將光緒元年正月初一日起至三年十二月底回疆肅清止收支各款彙爲一案繕具簡明清單恭摺敬呈

御覽

旨飭部核銷其光緒四年正月以後軍需收支款凡已
已飭令該台局隨時清釐以備另案具

奏伏乞

皇太后

皇上聖鑒訓示施行謹

奏光緒五年十一月初八日

請 飭部查照原單覈銷片

再同治十三年正月一起截至年底關隴肅清止軍需而收
支欸目前經臣遵

旨開單懇請

飭部核銷於光緒五年四月十一日專差具

奏嗣於六月二十一日差弁賫回原摺後開軍機大臣

奉

旨該部知道單併發欽此旋准戶部咨開單開支發隨
營辦事文武弁台局員弁薪水口糧等款查與該督上
屆報銷案內每年支用銀數尙不甚懸殊惟支發採買
軍糧草料米麩價值一款上屆報銷案內每年約支銀
三十六萬餘兩此案共支銀九十一萬四千餘兩較上

屆多銀五十五萬餘兩又支發採買馱騾什物喂養等銀一款上屆報銷案內每年約支銀十一萬餘兩此案共支銀十八萬八千餘兩較上屆多銀七萬餘兩又支發各州縣津貼酌補各官薪廉等銀一款上屆報銷案內每年約支銀三萬四千餘兩此案共支銀三十一萬八千餘兩較上屆多銀二十八萬餘兩以上各款較上案一年所以多支數十萬鉅款之故應轉飭糧台經管委員分晰開單咨部查核又補發各營弁勇口糧一兩四十三萬三百六十二兩零亦未聲明補支何年何營

鄂陝甘各路糧台道員王加敏辦理駐陝軍需局署陝西臬司陝安道沈應奎查明詳覆去後茲據王加敏沈應奎詳稱遵查同治十三年關隴肅清大軍籌議出關凡軍糧料草馱騾什物等項不能不寬爲購備俾免臨時缺乏採辦之物件既多需用之款目自鉅此採買糧料等項用過價值較前加增之原委也至酌補各官薪廉等項較上屆報銷案內銀數增多一節遵查同治十二年以前報銷案內支發各州縣津貼辦公并酌補各

前任積欠薪廉等項一款係專指酌發文職各官銀數而言其綠營武職員弁歷年積欠之項并未發給關隴肅清之後各營員弁兵丁紛紛具領不得量爲酌發前次清單內開銀數係將文武各官及營汛制兵支領之項併計在內此次支發銀數均係隨時酌發并無一定額數此酌發文武各官積欠薪廉等項與上屆報銷案內未能一律之原委也又補發各營弁勇口糧銀一百四十三萬三百六十二兩零亦未聲明補支何年何營欠餉飭查聲覆一節遵查上屆報銷案內曾經聲明

截至同治十二年年底止歷年積欠各營軍餉共銀八百二十五萬九千八百二十兩二錢二釐三毫二絲六忽此次補發銀內卽係欠發同治十二年以前截數開報欠餉八百二十五萬九千餘兩之內先行補發之項前單業將補發銀數在於欠發數內詳細聲明扣除且欠發各營軍餉均係遞年滾算亦無從按年分晰年分以上各節應請咨部仍照前單核銷等情具詳前來臣維軍需支款與常年經費不同常年經費歲有定額部臣逐年比較按冊而稽可以知其梗概軍需用款則不

然如支發餉銀則視收款之盈絀定支發之多寡採製各物則視需用之緩急道途之通塞商販之多寡價值之長落隨時採辦動用銀數非惟今歲不能比於舊數其需用緩急之間更有今日不能比於昨日者斷難擬之一律臣前次開報請銷各款不獨戶部行查各節與上屆銀數間有不同卽部臣所謂與上屆不甚懸殊之款亦皆非與上屆報銷之數適相脗合其實按年支發銀數多寡本有異同亦非按年均勻攤算止有此數臣前次奏請核實開報不必牽合部章者正爲此也在部

臣竊核支度查駁不厭精詳固爲慎重餉需起見惟臣受

恩深重值此時局艱難報銷各款若必俟部臣查駁然後飾詞聲覆牽合請銷殊非臣實事求是之初心所有同治十三年分軍需用款應請

飭下部臣仍照臣前次單開銀數核銷以歸簡易其光緒元年正月起至三年肅清回疆之日止用過各款銀數尤爲繁多已據王加敏沈應奎等開單具詳前來臣已另摺具

奏應請

飭部一併查照覈銷理合附片陳明伏乞

聖鑒訓示謹

奏

各省關籌解協餉各員併案請獎摺

奏爲各省關籌解協餉爲數較多各項差使人員出力已久謹併案請

獎恭繕清單仰祈

聖鑒事竊甘肅新疆軍需全資各省關協濟承平無事時戶部豫撥指撥之款通計四百數十萬兩臣入關度隴復督辦新疆軍務所有餉需一切靡不仰給外省戶部承

旨籌撥各省關隨時批解危局賴以支持臣於光緒二

年正月因關隴肅清稟案開單具奏爲時又已四載茲值新疆南北兩路一舉蕩平疆圻海關諸督同司道府員籌解接濟以顧急需於時局寔有神益其公忠體國不存纖細計較之私尋常畛域之見於古義寔有符合竊維東南芻粟西北甲兵本皆

國計所關以公家之財濟公家之用雖挹注因其時緩急權其可而究無彼此之可言惟人情各顧其私無論舍己芸人本爲不情之舉卽先人後己亦未免強以所難未可爲例惟在當局者斟酌損益出之在本省無憂

竭蹶在西陲得濟要需是以飽者壺殮之惠拯貧者楊
腹之危其於天理人情乃爲無歉矧

諭旨森嚴部文諄切願可深閉固拒巧詞諉謝自蹈愆

尤乎就各省關言之如前江西撫臣劉秉璋現任江西

撫臣李文敏均由藩司升任巡撫其於西征軍餉協解

最多前浙江藩司升任湖南巡撫臣衛榮光到浙後卽

毅然以西餉爲重迅籌起解前浙江撫臣梅啟照安徽

巡撫臣裕祿任內協解西征軍餉不待咨催前湖南撫

臣邵亨豫協解新餉外更解還舊欠且省陝甘應分還

廣西之欸一萬兩解濟西征雖爲數無幾足彰公道現
署甘肅藩司前浙江撫臣楊昌濬自同治六年浙藩任
內至光緒四年交卸撫篆止共解西征寔餉數踰千萬
兩較各省尤多督理閩海關稅務福州將軍臣慶春督
理粵海關稅務記名副都統俊啟解濟西餉不遺餘力
在該臣等同值時艱盡心籌措無非體

國之誠微臣得所藉手亦何敢以感幸私情上瀆

天聽願耿耿寸衷寔有未能督釋者應否仰懇

恩施將劉秉璋李文敏衛榮光梅啟照裕祿邵亨豫楊

昌濬慶春俊啟諸臣均

賞加頭品頂戴李文敏俊啟並

賞給正一品封典以示優異伏候

聖裁至閩浙督臣何璟調任兩江總督臣劉坤一四川

督臣丁寶楨於西陲軍事餉事極肯留心應懇

天恩交部從優議敘其籌餉最爲出力各員及差使出
力各員謹另繕清單恭呈

御覽伏懇

聖慈免其分別註考

恩准獎敘以示鼓勵伏乞

皇太后

皇上聖鑒訓示施行謹

奏

光緒六年正月二十六日內閣奉

上諭左宗棠奏各省關籌解協餉各員併案請獎開單
呈覽一摺新疆南北兩路軍務救平各省關歷年以來
籌濟協餉不遺餘力自應量加甄敘前江西巡撫劉秉
璋江西巡撫李文敏前湖南巡撫衛榮光前浙江巡撫

梅啟照安徽巡撫裕祿禮部左侍郎前湖南巡撫邵亨
豫署甘肅布政使楊昌濬前福州將軍慶春粵海關監
督俊啟均著賞加頭品頂戴李文敏俊啟並賞給正一
品封典閩浙總督何璟兩江總督劉坤一署四川總督
丁寶楨均著交部從優議敘其餘單開出力各員弁等
所請獎敘著該部議奏單併發欽此

新疆蕩平出力員弁彙案保獎摺

奏爲新疆南北路一律蕩平所有在事出力文武員弁
欽遵彙奉

恩旨彙案保獎謹繕清單恭摺具陳仰祈

聖鑒事竊臣欽奉光緒二年八月十六日

上諭左宗棠奏攻克古牧地堅巢克復烏魯木齊迪化
州各城詳細情形辦理極爲得手其餘出力員弁兵勇
著左宗棠彙案保獎等因欽此北路肅清引兵南下連
克達坂城托克遜堅巢會克吐魯番光緒三年五月初

十日欽奉

上諭左宗棠奏官軍會克吐魯番城詳細情形一摺張曜等迅赴戎機剿辦得手其餘出力員弁兵勇着准其彙案保獎等因欽此旋引軍而西拔喀喇沙爾庫車阿克蘇烏什克復東四城光緒三年十一月二十日內閣奉

上諭左宗棠奏官軍追剿逆回連復阿克蘇烏什兩城一摺此次官軍整旅征西於冰霜凜冽彌望戈壁之中一月馳驟三千餘里收復喀喇沙爾庫車阿克蘇烏什

四城南疆已復其半諸將士踴躍用命自應量予恩施
等因欽此復引兵西南拔英吉沙爾分兵南下葉爾羌
徇和闐正兵徑趨喀什噶爾於是西四城又克光緒四
年二月十二日欽奉

上諭本日左宗棠金順劉典由六百里加緊紅旗奏捷
克復南路西四城回疆一律肅清一摺湖廣同治三年
布魯特叛酋肇亂逆回金相印等攻陷喀什噶爾蠶食
南八城而吐魯番烏魯木齊等城相繼淪陷於今十有
餘年朝廷恭行天討現在南八城一律收復兩宮

皇太后宵旰焦勞知人善任用能內外一心將士用命
成此大功其餘出力文武員弁勇丁著左宗棠等查明
彙案保獎等因欽此均經恭錄宣示行間將士感奮歡
呼舞蹈有口同聲迭據各統將按照各次戰績分案請
保前來臣詳加覆核無異因伊犁尙稽收復懸案以待
而歷時既久隨摺請獎者已拜

恩綸同時在事出力員弁兵勇待

澤方殷未敢稍存歧視陝回及安集延布魯特等敗餘
各逆四次犯邊均經掃滅出力之員弁兵勇查明分案

保獎外謹先將蕩平新疆南北兩路出力員弁遵

旨彙爲一案開單請

獎以彰武節而策全功至陝甘轄境自潼關西抵哈密
邊界表延萬里臣自移節以來先靖關內以固封守嗣
奉督辦新疆軍務

恩命移關內之軍經營關外而關內新復各郡縣番回
雜處賊氛甫斂民氣未蘇仍須留駐重兵以資鎮撫臣
於二年正月由蘭州帶兵進駐肅州分遣諸軍出關卽
駐肅州調度軍食仰賴

皇威遐邇前驅轉戰迅赴戎機而關內外各防軍在事
員弁兵勇聯絡銜接行者居者同役同心是克不待乎
三年師無煩乎再駕各防軍猶復於暇時平治道路開
濬河渠助墾民田廣植官樹城堡駟舍橋道河梁凡民
力所不逮者皆防軍任之自涇原以西至於嘉峪回番
安戢伏莽潛銷自關外至於新疆丈田平賦開渠行水
百廢肇興纏民樂業耕牧各安其所有時征戍更番士
氣常新樂事赴功爭先恐後則防軍之前勞不可沒而
後效固可期也據統領精選等營陝西提督雷正綰甘

肅提臣周逢武統領卓勝軍記名提督金運昌統領蜀軍記名提督徐占彪統領安遠軍記名提督易開俊統領後路各營記名提督河州鎮總兵沈玉遂統領格毅等營署甯夏鎮總兵馮南斌統領楚軍中路各營記名提督借補甘肅鎮海協副將周紹濂統領武威軍平慶涇固道魏光燾開單請獎前來臣與幫辦甘肅新疆善後事宜臣楊昌濬就劉典開存擬保清冊逐一覆核合軍務防務護運工在敘次年分彙請

獎敘大軍出關已四載矣關內外各軍有勞足錄者甚

多茲僅就其勞績最著人才可用者加以甄錄然擬保之實職虛銜亦未敢過優也至新疆征戰多由北路進兵糧台隨營安設回疆有警則兵由烏魯木齊進糧台設於哈密或肅州調餉於附近各省調駝於蒙古調車駝於陝西承平無事時物畜豐盈猶虞不繼此次大軍由關內進發先平北路乃引軍南下創從前未有之奇兵變頻年人畜彫耗除設局歸化包頭採買糧料陸運五千餘里至巴里坤存儲接運外餘皆由涼甘肅採糧層遞灌運車馱騾駝用價購雇其承辦護運之印委員

弁獎泚遲延者一經覺察必予嚴懲其敏幹勤慎者固不能不予之獎勵也甘肅瘠苦甲於天下自設省歲需經費及新疆經費皆由戶部豫撥指撥每歲以四百數十萬兩計臣入關度隴後兵事日急需餉浩繁因各省關協餉不繼不得息借洋行及華商之款於是飭上海採運局收集借款并催閩浙粵東協款運解鄂台鄂台集各省關之餉運襄樊水陸設局運西征糧台隨時運解蘭州由蘭運肅由肅分運新疆各軍各局護運責之防軍揆運委之員弁幸少延誤其樸寔耐勞者固不

能不予以獎勵也又直隸承解京餉四川河南山東徑解協餉均由西征糧台回銷所委員弁亦宜酌予獎勵謹另具一摺開單請

旨其各省關將軍督撫監督臣不分畛域力顧西陲實本公忠至誼臣原不敢代乞

恩施然感幸佩慰之忱實有耿耿於懷不能自己者謹於另摺陳明請

旨除藍翎千總以下各弁照例咨部註冊外是否有當伏乞

皇太后

皇上聖鑒訓示施行謹

奏

軍機大臣奉

旨另有旨欽此